

LEGEINTZALDI BERRIA EAE-N. Ez zen sorpresarik izan Mahaiaren hautaketan. EH kanpoan geratu da, eta beste alderdiek eserleku bana lortu dute. Hala ere, lehen osoko bilkurak balio izan du Legebiltzarrean hiru bloke izango direla agerian uzteko.

Hiru taldetan bereizita ekin dio Gasteizko Legebiltzarrek zazpigarren legeintzaldiari

EAJk, EAK eta IUK bat egin zuten Mahaiko hiru eserleku hartzeko; PPk eta PSE-EEK bigarren blokea osatu zuten, eta EH bakarrik geratu zen lehen osoko bilkuran

Felix Iriarte | **GASTEIZ**

Seigarren legealdia bukatu zen haritik ekin dio zazpigarrenari Gasteizko Legebiltzarrek. Berrikuntza bakar bat ekarri du: Juan Jose Ibarretxek Legebiltzarra desegin eta hauteskundeak deitu zituenean EHk ez zuen parte hartzen; orain itzultea erabaki dute.

Zazpi talde parlamentario daude, baina hiru bloke. Agerran geratu zen hori atzo VII. legealdiari hasiera emateko lehen osoko bilkuran. Legebiltzarreko Mahaia hautatzeko EAJ-EA-IUK lehen taldea osatu zuten, eta Juan Maria Atutxa (lehendakari), Gorka Knörr (lehen lehendakariorde) eta Kontxi Bilbao (bigarren idazkari) Mahaiari jarri zituzten.

Bigarren taldea PPk eta PSE-EEK osatu zuten. Hauteskundeak egin aurretik hitzartuta zuten Mahaiko postuak eskuratzea, eta birekin geratu dira. Carmelo Barrio bigarren lehendakariordea izango da, eta Manuel Huertas sozialista lehen idazkaria. Kexu ziren pentsatzen dutelako Jaurlaritzako alderdiek ez dutela zuzen jokatu, eta Barriok Knörrek eskuratu zuen kargua merezi zuela.

Hirugarren taldea EHk eratu du. Beste alderdiekin akordioak egiteko gaitasunik gabe, bakarrik geratu zen Jon Salaberriaren hautagaitza defenditzeko. EHk idazkaritzarako bakarrik aurkeztu zuen hautagaia, pentsatuz hori dela herritarrek euren botoekin erabaki zutena maiatzaren 13an. EH Legebiltzarreko laugarren alderdia da, baina Mahaitik at geratu da, seigarrena balitz bezala.

Bozketek ez zuten bestelako sorpresarik ekarri. Juan Maria Atutxa hirugarren bozketan lortu zuen Legebiltzarreko lehendakaritza. 36 boto erdietsi zituen (EAJ, EA eta IU), baina lehen bi bozketetan gehiengo absolutua behar denez —38 boto alegia— gehiengo sinplea eskatzen zuen hirugarrena egin arte itxaron behar izan zuen. Gainontzeko alderdiak abstentitu egin ziren hiru bozketaldietan. Atutxak, beraz, 39 boto zuri eta 36 alde izan zituen.

Iuren abstentzioa

Gorka Knörrek —EAKo idazkari nagusia eta talde parlamentarioaren presidentea— Atutxak baino hiru boto gutxiago eskuratu zituen. IUko hiru parlamentarioek ez zioten botoa eman, zuriz bozkatu baitzuten,



MIREN SAEZ
Manuel Huertas, Gorka Knörr, Juan Mari Atutxa, Carmelo Barrio eta Kontxi Bilbao, Mahaia osatu berrian.

ATUTXA LEGEBILTZARREKO LEHENDAKARI

«Jarrera irekiak izan behar ditugu»

Juan Maria Atutxa Legebiltzarreko lehendakariak malgutasuna eskatu die talde parlamentarioei. Ganberako presidente izendatu bezain pronto hitz egiteko aukera izan zuen, eta jarrera irekia eskatu zien guztiei, bakea lortzeko. «Bakearekin konpromisoa dugu guztiok, eta behartuta gaude helburu hori lortzeko ahaleginak egitera, eta horrek eskatzen du jarrera irekiak izatea guztiok», esan zuen. Atutxak ez zuen hala adierazi baina lerro horiek irakurri zituenean gogoan izango zuen au-

reko legealdia nola amaitu zen, alderdien arteko etengabeko polemiken artean hain zuzen ere.

Bakea lortzeko atzera begiratzeko gomendatu zuen Atutxak. Iraganetik ikasi, datorrenari aurre egiteko. Hori da eskaini zuen formula. «Urte asko daramagu biolentziarekin eta ongi eta gaizki egin dugunarekin ikasi behar dugu. Gaur, jada, badakigu guztiok garelako beharrezko aurrean dugun erronka betetzeko», esan zuen.

Biolentziak kaltetutako biktimak ez zituen ahaztu Atutxak. «Gure arazorik garrantzitsuen indarkeria da. Horregatik ezer baino lehen gehien sufritzen ari direnak gogoan izan nahi ditut», adierazi

zuen. Halaber, herritar guztion segurtasuna bermatzeko neurri guztiak hartzearen alde hitz egin zuen Legebiltzarreko presidentek.

Gizarteak politikariei «jokabide garbiak» eskatzen dizkiela nabarmendu zuen Atutxak. Hori dela eta, jokaera sektarioak, irainak eta deskalifikazioak ez erabiltzeko eskatu zien Legebiltzarreko 75 parlamentarioei.

«Gure lehen erantzuna izan behar da balio positiboa ez den guztia ahaztea eta baztertzea. Sektarismoa, irainak, deskalifikazioak eta antzerako bekatuak baztertu behar ditugu, gizarteak hala eskatzen digulako», adierazi zuen Atutxak.